

MUSICA TA DI LUTO: CONOCIDO CANTANTE JUNI DE FREITAS A FAYECE

24 August, 2021, 10:20 am



Ken cu conoce Juni de Freitas sa di su trayectoria musical amplio cu e tabatin durante hopi aña y tabata sigur un shock pa tur hende ora cu e tristo noticia a dreña cu el a fayece.



Ultimo agrupacion cu el a forma parti di dje ta Banda Nos cu Nos, cu den pueblo ta hopi popular vooral ora cu nan sa presenta na Flor de Oriente. Pero pa esunnan cu no conoce di cerca, nos lo bay conta bo ken ta Juni.

Edmond Manuel de Freitas, miho conoci como Juni, a nace dia 22 di juli 1960. E ta yiu di Manuel de Freitas, trompetista, arreglista y compositor y Maica Willems cantante di coro di

misa. Na edad di 6 aña Juni a forma parti di e agrupacion musical **Estrellas del Barrio**. Fuera di tabata toca cuarta e tabata canta tambe.



Na e mesun edad ey te cu su 15 año e tabata miembro di **De Trupialen**. El a ricibi les di canto di Frere Alexius y meneer Rufo Odor. For di meneer Edgar 'Gachi' Boekhoudt e tabata sigui les di cuarta y for di Frere Servasius les di sonfonia di boca. En total el a sigui 9 año di les di canto y solfeo.

Na edad di 13 año, hunto cu su tata, el a bira integrante di **Combo Aruba**. Na edad di 15 año el a forma parti di e **Orkesta Sensacion del Caribe**. El a toca entre otro cu difunto Tito

Flores, Lord Boxoe y Vale Croes. Tambe hunto cu Claudius Philips. Na edad di 17 año Juni a pasa forma parti di **Orkesta Los Juveniles** tocando percusion y a la bes cantante. Na edad di 20 año el a pasa na forma parti di **Super Orquesta Quasi**. Despues di esey e la forma parti di **Claudius Philips y su agrupacion Oreo**.

Na año 2002 el a forma parti di **NBO** cu Kevin James. Na año 2009 el a forma parti di **Impak Band** hunto cu Freddy Vorst y Nando Brown q.e.p.d. Despues di esey el a lanta su mes un banda **TNT band**. Juni a yega di participa den diferente festival internacional entre otro festival di OTI na 3 ocasion cu su mes un composicion y a gana e derecho pa representa Aruba entre otro na festival di BUGA Colombia. Tambe el a representa Aruba na festival di Caribbean Broadcasting Organisacion na Corsou.

Fuera di esey Juni ta ganado di 3 songfestival internacional di Cuerpo Policial di Reinado Hulandes. Na Corsou compaña pa **Doble R SSS**; na St. Maarten cu **Control** di St. Maarten. Y na Aruba cu e banda forma pa oficialnan di polis Arubiano cu ta musico. Den su tempo liber Juni tabata duna les di canto gratis na e hobennan di su iglesia Cristian situa na Playa. Cu fayecimento di Juni de Freitas, Aruba ta perde un gran musico, cantante y compositor.

Juni tabata traha na Instituto di Cultura, tabata un ex-agente di Cuerpo Policial como tambe tabata traha na Parket Officier van Justitie. For di aki 24ora.com conhuntamente cu

TREMPAN, nos ta desea su casa Rosita, su yiunan, demas famia, amigo, conoci, su ex-coleganan di trabao y demas musico na Aruba, condolencia pa e perdida grandi aki.

Fuente: https://24ora.com/musica-ta-di-luto-conocido-cantante-juni-de-freitas-a-fayece/?utm_source=dlvr.it&utm_medium=facebook